



Brest, d'ar 7 a viz C'hwevrer 2020,

Abeg : Plas ar brezhoneg

Da : Listennadoù war ar renk evit dilennadegoù-Kêr

Brest au cœur ! - François Cuillandre
Brest à venir - Pierre Yves Cadalen
Brest c'est vous ! - Bernadette Malgorn
Brest écologie solidarités - Ronan Pichon
Brest imaginons demain - Pascal Olivard
La liste citoyenne
Marchons pour Brest ! - Marc Coatanéa

Itron, Aotrou,

War ar renk emaoch evit an dilennadegoù ti-kêr a zeu. Fellout a ra deomp sachañ hoc'h evezh war hor yezh, ar brezhoneg, ha war sevenadur Breizh. E-kreiz hor preder emañ an danvez-se, a zo e-kreiz ar gaoz ken ez eo hiziv an deiz, hag ho tivizoù, c'hwi hag a zo danvez dilennidi, o devo efedoù bras-bras er bloavezhioù a zeu.

SKED / Ti ar Brezhoneg ha sevenadur Breizh bro Vrest zo kevredad kevredigezhioù breizhek bro Vrest, muioc'h eget 50 hiziv an deiz, d'he fal diorren ar brezhoneg ha sevenadur Breizh war an takad a-bezh. **AI'TA!** zo ur strollad hag a stourm en un doare habask evit ma chomo bev ar brezhoneg.

Tu a zo da soñjal e vez komzet brezhoneg gant ur 35 000 a dud e Bro Vrest, 210 000 e Breizh, pa oa ouzhpenn ur milion a vrezhonegerien e penn kentañ an 20vet kantved. Se a zo kaoz eo bet renket ar brezhoneg gant an **UNESCO** e-mesk ar yezhoù en arvar bras da vont da get. Ma 'z eo gwir ne oa plas ebet evit ar brezhoneg, er c'hantved tremenet, nag er skol, nag er mediaoù, nag er vuhez foran, e weler memestra eo krog ar politikerezh unyezhek rik-se da gilañ un tamm evit leuskel plas d'an divyezhegezh. Muioc'h-muiañ e lakaer war-raok al liesseurted sevenadurel hag ar vad a ra an divyezhegezh, pe al liesyezhegezh zoken, evit sevel personelezh pep hini.

Da goulz ar bedeladur ez eus lorc'h er Vretoned gant o hevelebiezh : int a fell dezhe e chomo bev o yezh hag e vo treuzkaset d'ar rummadoù a zeu, paneveken dre ar skolioù, adalek ar skol-vamm betek ar c'hlas termen². Pouezus-kenañ eo perzh ar strollegezhioù lec'hel eta evit ma kresko buan al lusk-se ha ma vo respontet asambles d'an dae a zo ganeomp : ober ma vo adperc'hennet ar pezh a zo ul lodenn eus hor glad boutin hag ober ma vo diorroet ur brezhoneg bev, ijinus, gouest da virvidikaat an ekonomiezh hag al liammoù sokial.

Ar c'humunioù hag ar c'humuniezhoù kumunioù eo ar bazenn bolitikel tostañ d'ar geodedourien : gante e vez stummet an endro e-lec'h ma vevomp bemdez. Gwall vras eo atebeged an dilennidi lec'hel war an dachenn-se neuze 'ta. Se zo kaoz ma kinnigomp d'an holl listennoù war ar renk evit an dilennadegoù-se diskouez splann emaint a-du evit diorren ar brezhoneg ha sevenadur Breizh, hag int prest d'en em ouestlañ e obererezhioù pleustrek evit reiñ nerzh en-dro d'hor yezh ha d'hor sevenadur war an takad bro a vo en o c'harg.

Evit ma c'hallfe ar voterien gouzout peseurt obererezhioù emaoch e-sell da lakaat e plas evit ar brezhoneg ma vezit dilennet e kinnigomp deoc'h leuniañ ar furmskrud amañ-kevret hag e zistreiñ dimp **a-raok ar 24 a viz C'hwevrer 2020**.

Sklaer ha keodedel eo an intrudu-mañ : embann a raimp ho respontoù (pe ar fed ne vo respont ebet ganeoc'h) war hol lec'hienn www.sked.bzh. Treuzkaset e vint ivez d'ar c'hazetennoù a-raok an dilennadegoù,

2 Enklask TMO Rannvro Breizh nevezamzer 2018

da bep keodedour d'em dermeniñ goude se.

Sur omp oc'h dedennet gant an danvez-se a sell ouzhimp holl hag ho pediñ a reomp, ltronezed, Aotrounez, da zegemer hor gwellañ soñjoù, gant ar spi ma c'hellimp labourat ganeoc'h fonnus hag a-gevret evit dazont hor yezh.

I) Karta *Ya d'ar brezhoneg*

Skoazellet e vez ar strollegezhioù lec'hel gant Ofis Publik ar Brezhoneg a-benn diorren ar brezhoneg. Krog eo Kêr Vrest da gemer diarbennoù a-benn tizhout live 2 karta *Ya d'ar brezhoneg* : ha **prest oc'h da genderc'hel gant an hent-se a-benn tizhout al live 2, da vont pelloc'h c'hoazh?** Gant peseurt deiziataer ?

II) Ar brezhoneg er vuhez foran

1. Prest oc'h **da gaougantañ ha kenderc'hel** gant dibab ar c'huzul kêr a-vremañ (miz Gouere 2019) da hollekaat ar staliañ **panelloù-straed divyezhek** e pep lec'h bep gwech ma vo unan staliet pe erlec'hiet ?
2. Prest oc'h da lakaat SKED da gemer perzh e labourioù ar **bodad «anvioù straed»** ? Penaos ?
3. A-du emaoc'h evit reizhañ an **anvioù lec'h skrivet fall** a fed reizhskrivadur hag implij an **anvioù-lec'h orin e brezhoneg** ar muiañ posupl pa vo savet hentoù nevez, lodennaouegoù h.a. ? Ha **sevel a reot a-enep** da intrudu pe berzioù ar Post e sell **da c'hallekaat an anvioù straed pe gumun** ?
4. Petra emaoc'h e soñj ober evit **brasaat plas ar brezhoneg** war ar panelloù touristel ha war ar skritellañ e kêr dre vras ?
5. Prest oc'h da **gemer e kont ar brezhoneg er galvoù da ginnigoù da zont** da adneveziñ ar panellerezh ha **da zoujañ ouzh ar parder** brezhoneg / galleg war an holl banelloù divyezhek ?
6. Setu bloavezhioù ma c'houlenn ar c'hevredigezhioù breizhek ma vez savet **ur gwir "Ti ar brezhoneg ha sevenadurezh Breizh"**, a vije un arouez sevenadurel skedus o lakaat da dalvezout glad hag Istor Brest, he liammoù gant ar brezhoneg, oc'h aozañ darvoudoù sevenadurel breizhek e kreiz-kêr. Ma vezit dilennet, hag ur gwir Ti ar Vro hor bo e Brest, evel ma z'eus e Kemper, Roazhon, Naoned, Sant-Brieg pe Wened ?

III) Ar brezhoneg en deskadurezh

1. Hag-eñ, ma vezit dilennet, e sikouroc'h **da ziorren hentennoù divyezhek ha dre soubidigezh nevez** ? Ha da gehentiñ war an hentennoù-se ? Peseurt youl ho peus ?
2. Skoazell a reoc'h evit arc'hantaouiñ krouidigezh **magourioù** ha/pe lec'hioù degemer all evit bugaligoù e brezhoneg ?
3. Prest oc'h da genderc'hel da skoazell **skolioù DIWAN** ar gumun a-fed kellidañ ha da dalañ ur skodenn-skol kevatal ? Pe da reiñ ar skodenn-skol da vugale ho kumun a ya d'un hentenn divyezhek pe dre soubidigezh en ur gumun all ?
4. Prest oc'h da ginnig **1 eurvezh brezhoneg d'an holl skolidi** ha skoliadezed brestat (pourchaser eo SKED eus an doare-mañ a ra berzh met re nebeut a glasoù hiziv an devezh) ?

IV) Ar brezhoneg e buhez an Dinaz


1. Ma z'oc'h dilennet, hag-eñ e vo savet **ur post a zilennad daveat ha dileuriet** evit ar brezhoneg, ken evit kêr, ken evit ar veurgêr ? **Ur c'hefridiad gouestlet** a-bezh d'an danvez-se ? Daoust hag e vo roet d'ar politikerezh a-fet yezh ur raksteuñv a-ziforc'h hag a-vent gant an daeoù hag an ezhommoù ? Peseurt sammad ? (erbedet : 1€/bloaz da nebeutañ dre annezad)
2. Hag a-du oc'h evit ensaviñ **ur c'hengor ez-dinazel/bodad kuzuliañ hag eveshaat** engouestladennoù karta "Ya d'ar brezhoneg" hag en em vodfe div wezh bep bloaz.

3. Hag a-du ez oc'h da **niveriñ pet gwazour-ez divyezhek a zo** er strollegezh ha talvoudekaat, mar fell dezho, o barregezh a-fet yezh ? Pe da vare ?
4. Ha prest oc'h da drebadekaat ha kreñvaat ar c'hinnigoù **prantadoù-stummañ** d'ar brezhoneg evit ar wazourien-kêr ? Penaos ?
5. Hag a-du oc'h evit kinnig **un degemer divyezhek** e gwazerezhioù zo, gant koskor a-youl-vat, o **staliañ ar panellerezh** rekis hag hewel el lec'hioù dibabet (skritelloù, badjoù..) ?
6. Hag emouestañ a rit da enskrivañ **ar varregezh "brezhoneg"** war vuioc'h a fichennoù-stael ? (ATSEM, Levraoueg, degemer ar c'hevredig, talvoudekaat ar glad...) ?
7. Degemer a reot **ar c'hentanvioù brezhonek e Marilh ar Boblañs** ?
8. Ha kinniget e vo ganeoc'h (evel e Roazhon) **ul levrig-familh divyezhek** ?
9. Hag-eñ e vo staliet ganeoc'h ur **skritellerezh divyezhek ouzh savadurioù ha karbedoù** an Ti-Kêr, ar Veurgêr hag ar gwazerezhioù stag (Dourioù ar C'huzh-Heol h.a.) ?
10. E-giz kalzig kêrioù pe gumuniezhioù-kêr, hag emaoch a-du evit **divyezhekaat logoioù** Brest hag ar Veurgêr ?
11. N'eo ket bet divyezhekaet c'hoazh **load Brest.fr** war ar rouedad, paneve un nebeut pajennadoù sonn... Ur wech en Ti-Kêr, ha graet e vo ganeoc'h ?
12. Daoust hag e c'hell oc'h degemer **ur garta c'hrafek divyezhek** o talvezout d'an holl dielloù ha teulioù embannet (skritelloù, liesplegoù, furmskridoù...) ha kreñvaat plas ar brezhoneg er gelaouenn "Sillages", gant ur pennad reoliek e brezhoneg da skouer (emañ Sked o skridaozañ ur pennadig bep tro evit ar mare) ?
13. Hag-eñ emaoch o vont da ziorren **divyezhegezh ar furmskridoù** paneveken ar re a dalv da c'houlenn skoaziadennoù ?
14. Penaos emaoch e soñj da ziorren **bezañs ar brezhoneg en darvoudoù** liesseurt (sevenadurel, sportel..)
15. Hag-eñ oc'h gouest, c'hwi pe unan bennak eus ho roll, **da zistagañ ur bommig e brezhoneg pe da gregiñ ho prezegenn** gant ur gerig er yezh-se ? En ober a c'hellfec'h e-pad ar c'houlzad-mañ ? Ha degemer hor skoazell mar karit ? Hag ur wezh dilennet ?

Ho trugarekaat a reomp a-greiz kalon da vezañ bet ar vadelezh da lenn hor c'houlennoù. Hetiñ a reomp deoc'h ur c'houlzad a-feson !

A wir galon,

Evit SKED,
Bernez JESTIN, Kengadoriad



Evit Ai'ta !
Mélanie BOULIC

